



# Hmasawwnna Thar

( A N I N D E P E N D E N T D A I L Y N E W S P A P E R )

Regd. No. RNI - 40917/89 | Postal Regd. No. MNP - 67



Shania Twain in kum 15 hnungah album thar- P4

**Contact Numbers pawimaw :**  
 DC/CCPur : 03874-234234  
 SP/CCPur : 03874-236747  
 Police Station : 03874-202248  
 SP Control Room: 03874-233239  
 Dist. Hospital Casualty : 03874-233370  
 Fire Brigade : 8974 147 799/  
 8258 057 887 / 8974 103 600

Hmasawwnna Thar Vol - 32/135

Churachandpur

email : hmasawwnnatharnews@yahoo.com

Phone: +91-3874-236846

Rs 6/- per copy

## Election le inzawmin WhatsApp hmanga complaint pek thei



**CCPUR:** March 4 le 8, 2017 haia 11th Manipur Legislative Assembly Election hung um ding le inzawmin GPRS a ding WhatsApp Official Mobile No. **9436021798** activate a ni ta a. Hi number hmang hin Election le inzawmin sawiseln (complaint) anawleh thil indiklo um

hai le hril nuom nei han hi number-a hin thawn thei ning a ta, Election Model Code of Conduct (MCC) bawsietna um nia hrie le hmu han a thu, a thlalak, video le document chientawkwak tak leh ni numbera hin thawn thei ni dingin CEO, Manipur chun a hril.

## Pavanglai Conference hlawtling taka nei

**CCPUR:** Feb. 25-26, 2017 inkar sung khan ICI Biekin, Saikawt Sub-Hqrs hmunah Independent Church of India 3rd Pavanglai Conference hmang a nih. Conference thupui chu "Sandamna ropui" (Heb. 2:3) a nih.

Conference sung hin Khuo 10 haia inthawkw Group Song Competition nei a ni a. Pathien thu ngaithlakna, hlaa rawng-bawlna le reports hai

ngaithlak a ni a, zantieng hun haiah taksa ruoi thei hlak a ni bawkw. Zani zan khawmpui tumtiek zan khan REV. Lalramlawm inbuon, Presbytery Secretary in pathien thucha hrilna a nei a. inruolsieknaa lawmman hai semna nei a ni a, Rev. Lahlmingthang, Secretary, Evangelism, ICI in Benediction in Conference hi a khar.

## Indian Edn. Leadership Award Nomination a hmu

**CCPUR:** Sangai International University, Manipur (SIUM) chun Corporate Council for Leadership & Awareness (CCLA) Indian Education Leadership Award-2017 a dingin Nomination a hmu.

SIUM hi mani in-todel Private University a ni a, India ram pum-puia hiengang University 356 um hai lai hi Award dawng thei dinga Nomination hmu hai lai a thang a nih. CCLA hi India rama educational Institution, khawtlang hmasawwnna ding bakah sumdawngna



## CHANCHIN LAKTAWI

### Thlawp bik an neinaw thu

**CCPUR:** 11th Manipur Assembly Election hung um dinga hin Saikawt Sub-Division Demand Committee chun 59-Saikawt A/C sunga candidate thlawp bik an neinaw ding thu an hril a, candidate pathum hai chu ditsakna an inhlam seng bawkw.

### Morgue-ah a la um

**CCPUR:** Feb. 25, 2017 zantienga Saidan leilak hnuoia Tuihpui vadunga hung inlangdawkw naute thisa hmu a um ruong Police han va la a, District Hospital Morgue-a an hang sie chu zani chen khan Morgue-ah a la um zing. Tukhawm ngaiventu an la um nawh.

## GAS NEWS

**Agency : KIM JOE**  
 Booking : 21st. Nov., 2016 to 26th. Dec, 2016  
 Delivery : 27-02-2017 (MON)  
 Time : 8AM-till stock  
 STOCK : 306  
 19 kg. available  
**Agency: SAS**  
 Booking: 7th. Nov., 2016 to 7th. DEC., 2016  
 Delivery : 27-02-2017 (MON)  
 Time : 8AM- till stock  
 STOCK : 280  
 Rate: Rs. 809

# India in satellite 104 tumkhat thilthua a kapsuok-na hin khawvel history a siem: Narendra Modi, PM

**NEW DELHI:** Prime Minister Narendra Modi chun All India Radio fethlenga 'Mann Ki Baat' programme episode 19-na ah zanikhan thu a hril a, India chu khawvela tumkhat thilthua satellite 104 zet kapsuok hmasatak niin khawvel history a siem thu a hril. ISRO haiin vanboruok thil hai le inzawma programme hran hran an nei hai a hlawtling thu le, khawvel hrieta an sinthaw an dar zau pei thu PM chun a hril.



February 15 a United States, Israel, Kazakhstan, Switzerland, Netherlands le UAE haiin satellite an launch hai kawm PSLV C 37 a mi wawng an ni thu PM chun a hril a, India in earth observation satellite 'Cartosat 2D' a siem chun infrastructure, evaluation le planning a hai mapping thaw in, tlangram khuohai sukhmasawwnna dinga hmang ani ding thu a hril. Cartosat 2D chun abikin loneitu hai tadinga ham hatna an tlung ding niin PM chun a hril.

Satellite 104 a ruola kapsuokna chu ISRO in hlawtling taka tum 38 a sinthaw ra a suklangna ani ta thu, ISRO chau nilova India mipuihai hmang sukt hatu le ram sukrawitu an ni thu PM chun a hril a. ISRO a sinthawtu scientist hlawtling tak tak hai chu lawmpuina chibai a buk thu a puong bawkw.

PM chun defence thlura khawm India in hma a sawn pei thu a hril a, Ballistic Interceptor Missile ensinna hlawtling taka neina in a suklang thu le, kapsuoka a um lain, hmelmha hai missile 100 km a insangah a suksiet thu a hril.

India in a thaw ang thaw thei khawvelah ram-bung pali anawleh panga chau an um thu PM chun a hril a, Ballistic Interceptor Missile chu 2,000 km a hla kapsuok thei niin, hmelmha hai missile suksie wawng theitu ani thu a hril.

PM chun India in hma a sawn pei a, khawvela mihriem hai chu ei inthlak danglam pei bawkw lein, science and technology thlura hmasawwnna sukh-ratna dingin scientist tam lem mawam an ni thu a hril Bachao Beti Padhao' le inzawma hmalakna chu a fe tuong thu a hril. Vantlang tadinga inchnuka a hung ni tah a, mipuihai ngaiven le sawrkar programme hai laia tawp intai neilo a nih tiin PM chun a hril.

Sanitation campaign fe mekha mimal, organizations, agencies, sawrkar le society hran hran han thlawpa an thang tlang lein PM in a lawmthu a hril a, Ministry of Drinking Water and Sanitation programme hnuoia toilet hmang dan chungthua training neina ah, Ministry a Secretary meu khawm thanga thahnmengai taka thaw ani thu a hril.

Swachhata Pakhwada scheme fethlenga 'cleanliness drive' thawtu Ministries hran hran hai chungah PM in lawmthu a hril a, Doodardshan in cleanliness bulletin a thaw leia a lawm thu a hril bawkw.

T-20 world cup a hrana chawngu Indian Blind cricket team hai PM chun lawmpuina chibai a buk a. Divyang sungkuo chu theina inril tak neitu, huoi-senna neia hlawtling dinga theitawpa hmala hlaktu an ni thu hrilin, women's Asian Rugby Sevens Trophy a silver medal latuhai a lawmpuina thu PM chun a puong bawkw.

## Bungmual-ah Zan hun vote campaign khap

**CCPUR:** MLA Election hung um ding le inzawmin Bungmual Village Authority hmalknain zanikhan Kohran tum tuma Upa Committee le YPA hai leh joint meeting an nei a, chu hun chun election hung um ding le inzawma thil fel lem dinga hriet lein resolution tum tum an passed.

An resolution hai chupolling day-ah tawngtaina nei zova vote thlakna tan chau ding, Bungmual khawmsung-ah zan huna Public Vote campaign hrim hrim khap le open vote campaign nei nuom han zingkar-a inthawkw zantieng SPM chen campaign an nei thei ding; Vote thlak ding han identity proof an chawngi ding; Vote thlak zu hnunga polling station ar-

ea-ah tukhawm um chaw-bang phal lo ding; Khaw danga inthawkw volunteer lut phal ninaw ni a, khawmsung khawm volunteer siem khap a nih. Hi thupok bawsetu an lo um chun a maw annin phur an ta, an khawmsung mi khawdang/hmun danga volunteer a va suokdawkw an um a, harsatna an lo tuok chun anni mawphurna a ni ding; Joint committee ditna angin polling day niin candidate tukhawm polling booth le a sevela thingpui sem phal ninaw ni a, joint committee in polling personnel le agents le duty hai refreshment ding buopui an ta, sum seng hai candidate han an tum dinga remti a nih. Election buoina um lova thienghlum taka nei a ni theina dingin YPA, Kohran Upa le VA hai duty ding; hieng thil hai sukputlingna ding VA mawphurna sie a ni a. Chun, an khaw sungah election le inzawma poster tar hai a tartu hai phalna bova suksiet/lakthlak an khap bawkw.

## March 3 le 4 haiah Advertisement insuo lo dingin

**IMPHAL:** Political party or Candidate-hai chu March 3 & 4, 2017 hai khin Uttar Pradesh le Manipur haiah advertisement Print media haiah insuo lo dingin Election Commission of India chun Uttar Pradesh le Manipur a Chief Electoral Officer-hai an hrietit. Advertisement insuo a ni ding khawma MCMC Committee in phalna an pek a tul ding ti a nih.

## PS tinah Central Forces sie ding

**IMPHAL:** March 4 & 8, 2017 haia Manipur Assembly Election hung um dinga hin Polling Station (PS) tinah Central paramilitary Forces sie ning an ti. Union Home Ministry chun Assembly Election-a hmang ding hin Central paramilitary Forces companies 280 hung pek a temti ta a nih tiin Vivek Kumar Dewangan, Chief Electoral Officer, Manipur chun a hril.

## Pasal kum 61 mi le naute an hliem



**IMPHAL:** Lungawi lova mipui pungkawm hai hnawtdarna dingin zani 3:30AM vel khan Imphal East District Police han Khundrakpam Awang Leikai-ah tear gas Cell le silai an hmetpuok lein pasal kum 61 mi le naute thla 7 mi han hliemna an tuok.

Zani hmasa zan khan Sub-Inspector Maibam Khogen of Khundrakpam Awang Leikai in silai a hmetpuok tia intum a ni a. Hi lei hin Imphal East District Additional SP, Meghachandra le a rawihai Maibam Khogen Singh man tumin an va fe a, khawtlang mipuiin an remtinaw leia a dodalnaa mipui hi pungkawm an nih. Mipui lung-seng han Police motor 2 an suksiet. Hi lei hin Police le khawmsung mihai chu hun iemanichen zet an inbeitu hman a, hi hun Police han tear gas cell le silai hi an hmetpuok a nih.

## BJP in seats 40 chuong an lak ding niin a hril



**IMPHAL:** Manipur Assembly Constituencies 60 haia inthlangna hung um dinga hin BJP chun seats 40 chuong lang an ta, Manipur-ah sawrkarna an siem ding niin Union Human Resource Development Minister Prakash Javadekar in zanita BJP Office, Imphal-a Chanchinbumihai an hmupui hun a hril. PM Narendra Modi in Manipur state sawrkar an tumna hai chngchangah ieng-khawm dawnlet theina Manipur sawrkar chun a nei nawh tiin Javadekar chun a hril bawkw.

# Assembly Election neina states 5 haiah Vaibelsie tel man a ni tah Demonetisation lein pawisa a tlawm chuongnaw niin an lang

**NEW DELHI:** India rama States Assembly nei mek le nei zo ta states 5- Uttar Pradesh, Uttarakhand, Punjab, Goa le Manipur haia chun Election Commission in an din Surveillance teams han pawisa cheng vaibelsie (crore) tel an man ta bakah Zu le inruithet tam tak an man ta bawkw.



Pawisa le inruithet man tamna tak chu Phase 7-ah election nei Uttar Pradesh State a ni a, Uttar Pradesh- a hin February 25, 2017 chen khan pawisafai Rs. 115.70 crores man a ni ta a, Zu Rs. 20.29 lakh barrels, Rs. 57.69 lakh manhu le Narcotic Drugs kg. 2,725, Rs. 7.91 lakh manhu ding man a nitah tiin Election Commission chun a hril. Uttar Pradesh- a hin kum 2012 Election a khan pawisafai Rs. 36.29 crore, Zu Rs. 6.61 lakh manhu man a nih.

Tuta February thla bul laia Assembly Election phase 1-ah election lo nei zo tah Uttarakhand a chun pawisafai Rs. 3.40 crore, Zu Rs. 3.0 crores manhu le Drugs Rs. 37.99 lakh manhu ding tuchena hin man a ni ta a, Kamprayag biela election ding ruok chu candidate thi lein election nei lovin a la um. Uttarakhand a hin kum 2012 khan pawisafai Rs. 1.30 crore le Zu Rs. 15.15 lakh manhu ding man a nih.

Punjab a chun tuchenah pawisafai Rs. 58.02 crore man a ni ta a, Zu Rs. 13.36 crore manhu le drugs Rs. 18.26 crore manhu man a nih. Kum 2012 election huna khan Punjab a hin pawisafai Rs. 11.51 crore man a nih. February 4, 2017 nia phase khata election nei Goa a chun pawisafai Rs. 2.24 crore man a ni bakah Zu Rs. 1.07 crore manhu man a ni a. kum 2012 election huna khan pawisa Rs.

60 lakh chau man a ni a, Drugs le Zu lem chu tlawmte chau man a nih. March 4 le 8 haia election nei ding Manipur a chun pawisafai Rs. 89,28,200/- le Inruithet le Zu Nuoitel manhu man a ni ta bawkw. Kum 2012 Assembly Election huna khan Manipur a chun pawisafai Rs. 47 lakh chau man a nih. Hieng a chunga pawisafai mana um le inruithet dang dang mana um hai hi Election nuhnung taka mi

le enkhi in Black money do le sukbona ding tia Centre-a NDA sawrkarin Rs. 500 le Rs. 1000 notes hai that (demonetisation) thaw in pawisa laktuok thei zat limit chen siem sienkhawm election thila indiklo taka sum chelekna chu a dang chuon naw a, kum 2012 election huna nekin pawisa mana um hi a let tamin a pung a, Demonetisation lein political party tum tum le candidates han harsatna an nei chuong naw niin an lang.



## VAWISUN THUPUI

Taksa insawisawina hi thahnem chu a thahnem ve bawk a, Pathien ngaisakna ruok hin chu, hringna tuta uma le la hung um ding pek tiemna a nei leiin kawng tinrengah a thahnem a nih.

- 1 Timothe 4:8

## Editorial

### An duthusam, an beiseina le suong-tuona ram an hril a ni tak

Ei hriet seng angin, India ram chu democracy ram a ni a. Ei ni Manipur khawm India ram a ni ei ni leiin democracy roelna hnuoia mi ei ni ve bawk. Democracy ramah chun sukmasawn ding le mipui nun thui ngil dingin roreltu ding ei thlang a, roreltu chu mipui ta dinga mipui thlang a nih. Sawrkar a hung ngir khawmin party sawrkar ni lvoin, mipui sawrkar, mipui ta a nih. Ram hmangai a, siem thatu dingin Political party an um a thieng a. Chuongang mihai chun party an indin san chu ram le mipui an hmangai lei a ni ding a nih. Hi takah hin ei Political party-hai hi an inefie a ngai a, ram am an hmangai am an party ti hi. An party an hmangai lem sung chun midang party ngai thei ngainaw nihai.

Manipur chu March 4 le 8 haia election neia vote thlak ding ei nih. Hi inthlangnaa hrat tak ni chu party le candidate tin hai thiltum a nih. Mipui hipna le zawrna dingin election manifesto le party tha tak tak an siem a, an manifesto le an policy induong hai hi a thalo a um der naw a, a tha seng a, hnawl ding a um der nawh. An Manifesto le an party policy hai hi a tling tling han a zatve bek sukpuiting ta ang hai sienla chu ei ram hin hmel thar hung put a ta, hmasawna le changkangnain ei hmang pha ngei ring a um. Amiruokchu, hieng thil hai hin bawzui le ngaisak a hlaw ta nai naw leiin mipui chun iengmaloah ei ngai a, thaw dan pangngai ding hrim anga ngaina ei nei ta a nih.

Ram thuoituhai hin thudik tha em em el, thu tha tak tak, zui le zawm dinga tha hlie hlie an hril rawn hle a. A hrila hril hi chu an thiem. Nisienlakhawm a taka sukpuiting hi chu an um meu nawh. Ei ram hin, ram thuoitu, mani thu hril bawzui hlak a mamaw a nih. Ram thuoituhai hin an party manifesto le an party policy sukpuiting tak tak tum tak taklo, mipui hipna mei mei ding an siem a ni chun mipui inzanawna a nih tinaw ruol ni naw nih. Bawzui lo ding thu hril mei dam, sukpuiting lo ding manifesto le policy siem hi ei ram le a mipui hai ta dinga nghawng tha lo siem theitu a ni leiin ram thuoituhai chau ni lovin mipui tiengpang khawmaw bawzui dinga hma ei lak ngam a tul a nih.

Ram hmasawna ding le changkangna ding chun ram economy hi ngaipawimaw a tul a. Amiruokchu, political party hran hran an election manifesto le an party policy an puonglang tahai lai hin ram economy chungthu hrilna hmu ding a um nawh. Ei an vang vang a, political party hran hran hai ngaipawimaw le inhnika tak chu power inchuna a nih. Power le sum hi an buoipui tak a nih ti inla ei hril suol ring a um nawh. Khawvela buoina suok rawpna san khawm hi power inchuna lei a nih. Super Power inchuna leiin "Cold War" an ti hun lai khawm khan USSR chun an ram economy nekin power a ngaipawimaw leiin an ram-in a tuor pha a, an ram an inthedar pha a nih.

Manipur Assembly election hung um ding leiin vote campaign boruok a sosang lai tak a ni a. Political party tum tumhai nasa takin an insawiselin an indemtu a. A bik takin Manipur a sawrkar chel mel Congress party le Centre-a sawrkar cheltu BJP hai chu nasa takin an indemtu a, a ru inlang rawt rawt kawpin an indemtu a. Hieng thu hai hi ram le mipui hlakwina ding le sawr tangkai ding a um der nawh. Ram thuoituhai thu hril, an party policy le an manifesto hai hi ei an vang vang a, an duthusam, an beiseina le an suongtuona, an manga an mang (dream) anhril ni takin an lang. Corruption, Bandh le Economic Blockade umlo Manipur chu an siem thei tak tak ring a um nawh.

Election a hung um zatin ram thuoitu le Political Party tinin "chuongang chu ni tang kan tih" an ti seng hlak. Inthlang ei nei a, vote ei thlak a, votes ta hai tiem a hung ni a, sawrkar siem thei dinga a hrat tak party in sawrkar an hung siem a, sawrkar thar a hung um a. Sawrkar an hang chel a, mipui ei hung chier nawk sup sup hlak. Hienggang pei hin kum tam takel ei fe ta a nih. Sawrkar tha hung um theina ding chun Selkaltu Pawl hrattaw tak an um a tul. Tuta tuma election a hin selkaltu pawl, hrat taka rawl hung insuo thei ding an hung um ding niin an lang a. Hi thil hi tuta tuma Assembly election mipui han ei sawr tangkai thei a hung ni el thei.

ALL INDIA RADIO: CHURACHANDPUR PROGRAMME			
Date: February 27, 2017 (Monday)			
TRANSMISSION- FM-101.4 Megahertz			
Hours	Studio/	Programme	CD/No
5.23pm	CR/P	Signature	
5.25pm	CR/P	Vande Mataram, Time Reading, Opening Announcement Mangal Dhvani	
5.30pm	P	PAITE Prog., Sig. Tune & Announcement Announcer: Alex 1) Listener's Choice (modern song)	
6.00pm	P	HMAR Prog., sig. Tune & Announcement Announcer: K. Edith Hmar 1) Ngurte EAC KTP (Idv) 2) "Interview with H.P. Runrethang own composed song" Interviewer- N. Buhril	CD-376 CD-1161
6.30pm	P	THADOU Prog., sig. Tune & Announcement Announcer: Kaikhaim 1) Manglung Haokip (mod)	CD-1455

### Editorial Board

Lalmalsawm Sellate: Editor & Publisher  
Roding L. Sellate: Jt. Editor

Ramditum @ Rama Ralsun: Asst. Editor

Lalsansuok Pulamte & Samuel Zothanglien@SZ Zote: Sports

Joseph Joute: Freelance

Lalruotlien Dulien: Computer Assistant

Edited & Published by Lalmalsawm Sellate at HT Office, Lighthouse Lane, Churachandpur and Printed by him at Lamka Super Printer, Vengnuam, Hiangtam Lamka, CCPur, Manipur.

# THUTIEM HLEN LE HLEN LO

(Promise fulfilled & unfulfilled)

By: L.Keivom

Political promises are much like marriage vows. They are made at the beginning of the relationship between candidate and voter, but are quickly forgotten.

-Dick Gregory



Ei tawnga 'thutiem' ei ti hin umzie hrang hrang a fun rawn hle. A umzie hrang hrang hrilna tawngkam ruok chu ei hau ve nawh. Saptawnga vow, oath, pledge, plight, promise, undertaking, swearing le a dang dang hi thutiem amaniih intiemkam hrilna tawngkam vawng a nih. Thutiem hi danin a phut lei dam, inhnaw luina lei dam le mani lungril puoksuoka intiem a um a. Chun thu intukna (condition) nei chi le intukna um lo (unconditional) a tiem le hlen chi a um bawk. Thutiem hlen dinga intiem naran el khawm ni lo, hlen naw chun a tiemtu chungah thil tha lo iemani- chu chu kha kha- tung dinga mani hringna le van sala inkhâm hiel khawm an um. Chuong mihai chun a 'pâp' an tuor hlak niin an ring.

Thuhrlitu 5 :2-7 ei tiem chun, hi thil hi Lal Solomon khawm kha a lo invawi khawp el. Chuleiin, thil hnung ding dawn loa nuompawnga lei per rang hang that nawzie hieng hin a lo ziek a ni kha:

"I bau phawng inrang naw la, Pathien hmaa thu i hril dingin, i lungril inhmaw naw raw se. Pathien chu vâna um a na, nang chu hnuoia um i na, chuleiin hril rawn naw rawh. Buoi taluo chu mang sietna a na, invêt chu tawng rawna a nih. Pathien kuoma thu i tiem chu hlen inhmaw rawh. Mi invet chungah Pathien a lawm ngai nawh; i thu tiem chu hlen ngei rawh. Thu tiem sia hlen lo nek chun intiem naw law law a tha lem. I bauin suol inthawtir naw raw se che. Tempula Pathien mi tir kuoma chun, "Ka lo intiem suol a nih" tiin thang la ngai naw rawh. Ieng leiin am i bau suoka Pathien suklungsenin, i kut suok thilhai chu a sukboh mang ding a na?" (DV)

Mosie khawmin Deuteronomi 23:21-23 ah hieng hin a lo ziek bawk: "LALPA in Pathien kuomah thutiem in nei chun sawt riel loin pe tlak vat ro, LALPA in Pathien chun hung thin ngei a ti chêu a, suola thiem naw chang rawi in tih. 22 Thil pe dinga intiem naw ruok chu suol a ni nawh. 23 Băua in intiem ta laklaw si chun in hlen ngei ding a nih, in bau ngeia LALPA in Pathien kuoma in nuom thua in intiem a ni si a" tiin.

Thuthlung Hluia hin thutiem (vows) chi hrang hrang le hlena a um dan inziékna vavi 47 lai ei hmu a, Thuthlung Thara ruok chu Tirko Paula chanchin le rawngbawlna le inzawmin vavi iemani zat ei hmu bak chu a tam nawh. Korinth kohranhai zawna indawn a hril fiennaah innei dinga thutiem le a tiemtu chu minu a lo ni a, a pa amaniih a pasal amaniih hrietpui loa a lo intiem a ni chun a pa amaniih a pasalin amaniih a hriet hnunga a remtipui naw chun a thutiem chu sutin a fielim thei thu, Mosie'n Nambur 30-a fie taka a lo ziek kha a hung phaw lang bawk a. Hieng lai thu hi tukver danga ei thir chun, ei pi le puhaiin minu ngirhmun hrilna, "Nuhmei thu, thu ni lo; ai sa, sa ni lo" ti leh pah khawm thin ang an ni a, feminist movement (women liberation) hai ngai chuh a Pathien thu naw hle el thei. Tuta thla (February 2017) sunga Nagaland-a Municipal inthlanga minu chanpuola seat 33% sawrkarin a hauh chu pasalin an remti naw leia buoina sosang tung le sawrkar khawmin a thu a hnuk kir thu khawm tlang hriet a nih. Naga hnam 18 inzawmkhawm chun nuhmei-pasal intluk tlangna a pawm nawh. Chu chu anni ngai chuh Pathien thu a ni tlat!

Chun, thil tha thaw dinga thu intiem a um ang bawkin thil tha lo thaw dinga thu intiem khawm a um. Anania le Safira hai nupa inthukawpa an ram zawr man arênga thawlawma pe loa iemani zat an ip tum leia an nupain an thi pha thu ei hmu a. Paula an that hma khata faa dawn lo dinga mi sawmli ruol intiemkam le inkhâm ei hmu bawk (Tt 23:21). Israel hnam pungkhawmin Benjamin hnamhai laka phuba an lak thu le an naunhai chu Benjamin hnama mihai kuoma an nuhmei ding pe lo dinga thu tiema an inkhâm thu khawm Roreltuhai 20-21 ah ei hmuh.

Mihriemin thil tha naw tiengna thu ei intiemkam amaniih inkhâm rawna tak chu phuba lak a ni ring a um. Thurosie an maksan tam tak khawm an dam laia suknawmnatuhai chungah phuba hung la ngei dinga an inchana thu a nih. William Shakespeare drama zieka inlar pawl tak chu phuba lakna thu hrilna 'Hamlet' a nih. Sienkhawm, mihriemin an kuta phuba an lak Pathienin a phal nawh. "Phuba lak hi ka chan a na, anni chu thungrul ka ta, a hun a hung tung pha chun an sir la'n phet vawng a tih" (Deut 32:35) a ti bakah Paula chun, "Phuba la naw unla, Pathien lungseninaa rul dingin khêk lem ro: 'Phuba lak chu ka chan a nih, keiman thungrul ka tih' Lalpan a tih" (Rom 12:19) tiin a lo ziek bawk hi a nih.

Hi chingthua Isu hril, Mathaiin a rikawt (5:33-37) hi a chieng fek fawk khawp el: "Tien lai mihai kuomah, 'Khêlin inkhâm naw unla, Lalpa kuoma in inkhâmna chu in hlen ngei ding a nih' ti a nih ti in hriet bawk a. Kei ruok chun ka hril chêu hi, inkhâm ngai hrim hrim naw ro. Van sâlin inkhâm naw ro, chu chu Pathien lai thungpha a nih. Hnuoi sâl khawmin inkhâm naw ro, chu chu a ke nghtsan a ni si a. Jerusalem sâlin inkhâm bawk naw ro, chu chu Lal ropui tak khawpui a nih. In lu sâlin inkhâm naw ro, in sam zai khat khawm suktookin in sukdam thei si nawh. In thu hrila chun 'A nih' ti chu a nih ni sien, 'A ni nawh' ti chu a ni nawh ni el raw se; chu bâk chu suola inthawka suok vawng a nih."

Jakob chun, "Ka unahai, inkhâm ngai naw ro. 'A nih' in ti chu 'A nih' ni sien, 'A ni nawh' in ti chu 'A ni nawh' ni el raw se, chuong naw chun thiem naw chang hlauh rawi in tih" (5:12) a lo ti bakah "Vawisun amaniih zing amaniih, chu khuoa chun feng ei ta, chu taka chunk um khat va sumdawng ei ta, sum tam tak lam ei thil" tituhai, zinga chun in hringna ieng tin am a um ding ti in hriet si nawh. In hringna chu iem a na? Sum sawt naw te hung inlanga bo nawk el ang chauh a ni si a. 'Lalpan a remti chun dam ei ta, chu chu kha kha thaw'ng ei tih' in ti lem ding a nih" (4: 14-15) a lo ti bawk a nih.

Chuonga mani hringna chunga thuneina nei lo, mitkhap kar loa thi thei mihriem chun, chu chu kha kha thawng ka tih ti-a-thu ram tin tiem thei ngirhmun a um ei ni? Hi hi zawna khir tak el a nih. India Danpui hnuoia sin pawimaw thaw dinghai chun an sin an tan hman Danpuiin a ti ang taka thaw dinga intiemkamna (swearing/oath-taking) an nei hlak a, bawsetuhai chu man an ni chun dan anga hrem an ni hlak. Roreltu hmaah tu khawm sakhia thang ding chun thu indik chauh hril dinga intiemkamna a nei hmasa phawt hlak. Kohrana rawngbawltu ding chun kohran thuring le inchuktina dungzuaia bawl dinga intiemkamna a nei zet hnungin namnghet a ni chauh hlak. Hienga dan thuneina hnuoia kûn dinga intiemkamna hi danin a phut a ni leiin makmawa thaw ngai a nih. Tuta ei thlur tum ruok chu mani lung puoksuoka intiemna a nih.

### Mani tawnhriet

Mi tam tak chu lung phur thut leia thutiem amaniih intiemkamna nei, a hnunga insir nawk si dam ei um ka ring. Thuhrlit thiem kam tleua intawltu a, nein a tlin bâk bâk thawlawm thaw dinga intiem, a tûkah lungril fima ngaituo pha leh thaw ngaina hre loa lu huot el le a hlenna dinga pûk ding dap ruoi el khawm ei um hlak. Inthina le inhnawna leia 'thutthut pawlisi' hmanga 'tiem thut' amaniih 'piengthar thut' ei um hlak bawk. Roreltuhai 11-a Gilead mi Jetha anga ngaituo set loa thu tiem thut (rash promise, vow), a hnunga insira kei kir thei ni ta si lo ang dam hi a tam ring a um. Chuong anga intiemkamna chu Thuthlung Hlui Pathienin a dit naw thu Thuhrlitu Solomon kha a lo ziek a nih.

A chang chun lung hung puok thut leia inring hman loa thu ei tiem a um hlak. Kum 1963-a ka tawnhriet pakhat hang hril vak ka tih. D.M.College-a B.A Final Year ka ni laiin Dari leh kan innei a, Imphal (Paona Road) ah pandan chi te kan

hluo a. Ni khat chu Chekkon (Tribal Colony) a um kan u Lalngatta hai inah leng dingin rickshaw-in kan fe a. Rûn leilak kai tungna kha tlan kai zo a ni ngai naw leiin kan tum a, ke-in a leilak tawp chen kan hraw a. Leilak khela mi lo hmuoktu hmasa tak chu sawrkar thawktu ofisar lienhai umna dinga kuarter insi khupa an bawl chu a nih. Inngaituo lawk thak loin kannu kuomah, "Bilding ropui tak tak hai hi i hmu? Hieng nek daia ropui le lien lemah ka la sie ding che a nih!" ka ta.

Kum 13 hnungah, 1966-a fawren-a kan um tana inthawkin ka thutiem kha tak ramah a hung inchang a, kum 21 sung a zawna kan posting sungin bu faka mi lien mi lal fielna ding khawma inzapui um lo in inhawi le changkangah kan am a, Delhi tieng kan hung kirin keini inah ngei vawisun chen hin kan khawsa zui tah pei a nih. A hnung daia ka ngaituo suok changa mak ka ti nawn rawp hlak chu: leng ngaituona le hisapna am hmangin ka thutiem kha ka lo insam suok ning a ta? Khang lai kha B.A ka la zo nawh. Ka khawpui hmu hlat tak chu Imphal a nih. Vuongnaa inzin phak chu hril lo, rel (train) khawm ka la hmu nawh. "Rêl lu khawm hmu loa B.A tling" an ti pawla mi ka nih. Civil Services Exam a um hlak ti ruok chu ka hriet tah. Sienkhawm, iengkhawm thaw hmaa M.A ni ka tum hmasa phawt. Ka tum lungril tak lem chu Ph.D lak hnunga khawvel hrieta hmingthang ding Institute of Tribology indin a nih. M.A ka zo chun Competitive Exam hi an hril vung nasa khawp el a, inbuotsaina mumal khawm um loin a aitecheuna dingin ka zu ekzam ve leh intarvui-ah an mi ko a, Indian Revenue Service (IRS) an mi pek a, 1967 kha Indian Excise & Customs Service ka zawm a, chu chu 1970 kha maksanin ka sin dit tak IFS ka zawm tah a nih. Imphal rickshaw-a inthawka India flag intarna Mercedes Car-a chuong inkara hin thâ le lungril ieng zat hiel am seng a ngai ti hih a taka hmasuontu naw chun hriet fie harsa ngawt dingin ka ring. Pherzawl tlanga inthawk lem chun Pathien kut hrat thuoimo lo chun hang ban phak ruoi a ni nawh.

Chuleiin, Rûn leilaka inthawka ka nuhmei kuoma thu ka tiem khah, ka hma khala hnuoi tienga inthawka mi dawmtuin ka bau a hawng leia thil um a nih ti inla, a suol tam naw el thei. Hienga ngaituona pangngai khela mak taka ei tawnhriet hi Sapt awng chun 'mystical experience' an tih. Ei thil hmu zing zing, a umzie ei hriet lo, thawk le khata a umzie ei zuk hmu le hriet chieng em em dam hi lungril le thlarau mita khâr a hung inhawng lei a nih. Kawng danga hril chun, ei ngaituona mit dâltu phuhlip a tlak lei a nih. Chu phuhlip chi hrang hrang chun ei lungril mit a hlie sung chun iengkhawm a nina angin ei hmu thei nawh. Hrieta tui fima ei phi thlak pha ruok chuh kha hmaa ei hmu fie thei lo khawm ei hung hmu chieng thei hlak a nih. Damaska kawtsuo a tung hmaa Paula ngirhmun khawm khah a danglam chuong nawh.

Hun sawt naw te hi hnuoia mihriem taksa puta ei hung inzin sung hin ni tinin sirbi pakhata inthawkin sirbi tharah ei chuong kai pei a. Kum khat hi sirbi khatah lo ngai inla, sirbi zakhat chuong phak chu ni suok hlama arasi tiem ang a nih. Kum za liem taa muol lo liem tah hai inlawina thlanmuola thlan lung an ziekhai hi hang en inla, sirbi 35-40 chuong phak chu a dam sawt pawl an lo nih. Hringnun sirbi thara ka chuong kai zat in: "Lalpa, sirbi hieng chen i mi thuoitu tung tah chun, keima hmanga iemani hien tun i nei ka ring a, chu chu hre fie thei dingin mi thungpui la, i hrata ne thilthawtheina ringa taima taka hlen suok dingin thu ka tiem che" ti hih Pathien kuoma ka tawngtaina a ni hlak a. Pathien kuoma ka thutiem hlena a um zatin sirbi insang lemah a mi hlakngai a. Ka nun ka sui kir changin, tak nekin mang ram a hawi lem hielin ka hriet hlak.

Dam sunga thaw ngei ngei ka nuom le tum, Pathien kuoma khawm hlen ngei ka nuom thu ka'n tlin hlak, sienkhawm thaw ngei dinga thu ka tiem ngam lo chuh mani tawnga Baibul inlet le mani sum ngeia sut a nih. Hi mawphurna hi phur suok thei dingin ka hriet naw lai khawmin lengkim Lalpa chun ka chin te-a inthawkin a mi lo ser tung a nih ti ka hung upat tieng keimaah a hung fie deu deu a. Sienkhawm, thil hautak, ka hriet ve phak china chui eini lai tu khawmin an la thaw ngai lo thil a lo ni a, ngaituo chik po leh huphur a na tul tul a. Mi ka rawn po hlak chun ka dam sunga ka thaw zo an mi ringpui naw bakah tan laklaw lo dingin an mi'n fui lem a. Pension chen raua inthla loa mi thuoitu thungpuiinaa thaw thei a nih ti ka ring tlat leiin ka dam sunga hlen dingin Pathien kuomah thu ka tiem a. Kum 2002-a ka pension charin inlet sin ka tan a, ni tin darkar 12-16 sin ka thaw a, kum 3 le thla 7 in a thuoipui inlet chu ka zo hman der a nih. Kum 2002-in a aitecheunain Johan ziek po bu mal kan sut a; kum 2004-ah Thuthlung Thar, Sam & Thuvar inkawp kan sut nawk a; Baibul pumpui khawm kum 2007 kha a hung suok a, Revised Edition khawm 2015 a hung suok tak pei a nih. Pathien kuoma ka thutiem hlenna a ni bakah Hmar tawng hi a dam khawsuok ding chun a hnukpui pawimaw a ni leiin, Pathien zarin thangsuoah kan ngai.

Thutiem nei a, chu chu hlen tuma nasa taka thung lak hi taima taka inthlada loa sin thaw dinga mi turtu a ni leiin thil tha tak a nih. Entiran, kar tin suok Delhi Thurawn (DT) hi so a la'n phu det det sung chu sukhring dinga David Buhril leh thu kan lo intiem tah leiin, pei amaniih pei lo, inhman amaniih inhman lo thu hril loa kar tina artikol pakhat bek ziek a ngai leiin, kan thutiem hlen ding hin kar tin zain khat khawvarpui a ngai. Kha hma kha, Zoram khawvel hmun hrang hranga inthawkin an Journal/Magazine/Souvenir-a insuo ding artikol ziek ding fielna thla tin a tlawm takah voi khat bek ka dawng hlak a. Ziek dinga ka lo intiemna chu sukpuiting ngei ka tum leiin ka sawlpui thei hle a. Baibul inlet ka tan hnung ruok chun hun awl ka nei naw leiin lo thei lo ti ngawt naw chuh ka hman naw thu ka hril nghal hlak a. Phur zo lo thaw dinga intiem chu mani inhlemaah ka ngai leiin, tu hin chu ka hlen thei ngei dinga ka ngai naw chuh mawphurna la dinga intiem hi ka bansan tah.

### Inthlang thutiem hi teh?

Eini lai inthlang huna an thutiemhai hi zaa zahni bawsiet ding le mipui hlemna le awkna dinga sa tlang an tawdkar a hawi tak a, Zuntenu thutiem leh a danglam a um nawh. A tawpaha thutiem ngaktu kut a ek khum a, a vuong hmang daih a ni kha!

A tienami hrie ieng zat am ei um a? Thlakhur hin a huonah chang a kam a, a awk thei khawp el a. Sienkhawm a chang awk chu tu-in amaniih a lo lak khal zie a. Man tumin chang dang a kam a, Zuntenu hi a lo awk a. Ama chun, "Min suo la, siem ka ti che" a ta, an suo a. A hnungah Thlakhur chun tui a ting a, tuiin amaniih a lo suknu vawng hlak a. Man tumin Zuntenu leh an inchan a. Tui suknu chu Vanchung nunghak Longlai, hmel tha tak el, a hmel ênga vadung kawi sari khawm el var thei a lo ni a. Thlakhur chun a hmuin a ngaizawng nghal a. Man tumin Zuntenu leh bei rak hai sien khawm an man thei si naw leiin, Thlakhur beidawngin, "Zuntenu, siem ka ti che i mi ti a, sienkhawm lungngaina ngawt lungngaina ngawt a la ni si!" tiin a chier khum a. Zuntenu chun Thlakhur a kutpha daw dingin a hril a, a daw charin a kut chungah chun a ek a che teu a, a vuong hmangan dai a. Thlakhur kut chu a hung inpan a, a thipui tah a nih.

Mi siem lientu dinga intiemhai hin ieng chen hiel am ek mi che khumin an mi vuong hmangan ding a na? Ieng chen tawp am ei biela ei ngai hi Zuntenu bielah ei inchangtir zing ding? (Saturday February 18, 2017 Delhi)

## Meghalaya-ah UALA chief kaphlum

TURA: Zani hmasak zan 7:00 PM laia inkapna chu khan United A'chik Liberation Army (UALA) le police team hai thangna chief Singbirth Marak alias Norrok X. Momin chu Garo Hills hmuna inkaptoona a nih. Inkap tlungna khuoa hin

UALA cadre pali vel an um a, Special Force haiin in surrender dingin an hril zawm loa an kap leia inkaptoona chu tlung a nih. Momin a kuta inthawk AK Rifle le Pistol pakhat ve ve

police haiin an man. UALA chu nikum June thla kha suktawp an ni tah a, an tawp hnunga mi tlawmte hung insiem thar nawk niin police thusuok chun a hril. Monim chu commander-

in-chief niin, sawrkar le inbiékna an nei lai khawma an thlutluka a lungawi naw hrim a nih. An chairman inrawina in sawrkar leh peace talks nei dingin nikum June thla kha UALA chun

Meghalaya CM Mukul Sangma le Home Minister Roshan Warji hai hmaah helna chawlsan dingin thutlukna an nei a nih. Chu lai huna chun UALA chun cadre 68 a nei a nih.



LAKTAWI

C'garh Assembly Budget session tan ding

RAIPUR: Chhattisgarh Assembly Budget session chu vawisun tan ning a tih. Zu zawrna chungthu le thupui hran hran hmanga opposition haiin sawrkar khing an tum leiin, budget session chu rihau a nasa dinga ring a nih. Zu zawr khap dinga sawrkar an nawr ding thu senior congress leader pakhatin a hril. Chhattisgarh sawrkar chun, kha hma met lai khan state sunga Zu zawrna thunun a, Indian Made Foreign Liquor (IMFL) enkawlitu ding corporation siem dingin thutlukna a lo nei a nih. Budget session huna hin, opposition hai chun bonus a Rs. 300 pek dinga an ngenna sukhtar nawk an ta, sawrkarna siemtu BJP in loneituhai an lohma suok quintal khat peiah thangpui-na Rs. 2,100 pek dinga an intienna chungthu khawm sukhtar ni bawk a tih. Inpui inthung vavi 21 Budget session sung hin nei dinga ti a na, March 30 hin session khar ning a tih. Session nei sunga ngaituo ding February 25 chen khar zawna 2,611 hmu ani tah a, chu hai laia 1,375 hai chu ngai pawimaw zuol an nih. Chief Minister le Finance mawphurna cheltu Raman Singh in March 6 hin Assembly Budget 2017-2018 pharna nei a tih.

Thautui pipe puokdar leiin mi 4 an thi

WARRI: Nigeria rama chun zani hmasa zan khar thautui pipe a puokdar leiin mi 4 in thina an tuok niin local official thusuok chun a hril. Hieng laizing hin a pipeline neitu Nigeria Liquefied Natural Gas Limited (NLNG) le Nigerian Agip Oil Company chun hi pipeline puokdar leia mihrimethina tuok an um naw thu an hril ve thung. Iengleia piple hi puokdar am a nia ti hriet a la ninaw a, suizui mek a nih.

Thautui pipe puokdar leiin mi 4 an thi

WARRI: Nigeria rama chun zani hmasa zan khar thautui pipe a puokdar leiin mi 4 in thina an tuok niin local official thusuok chun a hril. Hieng laizing hin a pipeline neitu Nigeria Liquefied Natural Gas Limited (NLNG) le Nigerian Agip Oil Company chun hi pipeline puokdar leia mihrimethina tuok an um naw thu an hril ve thung. Iengleia piple hi puokdar am a nia ti hriet a la ninaw a, suizui mek a nih.

Thuoihmanga um civil mi 42 hai insuo

KABUL: Afghanistan-a Islamic State (IS) helpawl han civil mi 42 an thuoihmang hai chu tuolsung upa le thuneitu han IS hai an inbiempui hnungin dam le hima insuo an nitah tiin zanita official thusuok chun a hril. Hieng civil mi hai hi thla 4 vel liemtaa kha Panchir-Angam district-a inthawka an thuoihmang an nih.

Conservatives in Angela Merkel

BERLIN: September thlaa parliamentary Election hung um dingah Conservatives chun German Chancellor Angela Merkel chu an party top candidate dingin official in an nominate tah. Merkel hin thlawptu delegates 95% zet a hmu a nih. Merkel hin kum 1990 a inthawka kha Stralsund Parliamentary constituency hi a lo chel ta a nih.

Taliban hotu in mipui hai thing tamlem phun dingin an infui

KABUL: Afghanistan a Taliban helpawl thuoiit Hibatullah Akhundzada chun Afghanistan mipui hai chu an ram sunga thingkung tamlem phun dingin an fui. Afghanistan rama mipui tamlem chun thlaisuonnga le thil dang danga dingin thing an hmang nasa leiin thingkung an sathluk nasa hle a, hi lei hin a ram sunga thingkung thlawmtiang a pan leiin hasratna nasa tak an tuok mek a nih. Mr Akhundzada hi Muslim sakhuo thuoiit a ni a,

Meghalaya-a Truck eksiden-ah mi 16 thi



NONGSTON: Zanikhan Nongspung, West Khasi Hills ah Truck pakhat mi 60 phuru chu a tlan hrat taluo leia driver in a thunun thei naw leiin, Highway daidanna 'concrete barricade' a tlan liem pal a, a sunga chuong mi 16 haiin thina an tuok pha. Hliem hai chu hospital a enkawl mek niin, a hliem inrik an tam leiin a thi hi an la pung pei ring a nih. Truck in tuoksiet a tuokna hmuna mi 12 an thi ngahal a, midang 4 hai chu hospital a thi an nih. West Khasi Hills SP Sylvester Nontger in a hril dan chun, lamkawi ding lai a driver in a steering a thunun hne nawh a, tuoksiet chu ngaihana leia tung niin a hril. Truck chun mi 30 vel chau a phur ni dinga an ring laiin, room sung-ah mi tam tak an tla hmu an nih a, Truck a chun mi 60 an chuong hriet ani ta thu a hril bawk. Truck hi inkhawm fehais phurta nia hril a nih.

Nagaland buoina ah office 30 suksiet

DIMAPUR: February 2 a ULB election um ding leia Nagaland sunga buoina tung leia mipuiin sawrkar office an suksiet chu 30 a tling niin Kohima DC, Rajesh Soundararajan chun a hril. Hi chungthu hi Zirtawpni a Kohima hmuna office tum tuma lukhaitu haiin meeting an nei huna kohima DC in a hril a nih. Meeting a chun office suksiet hai siemthat dan ding ngaituo a na, a laklaw sung chun room ruok hai hmang tangkaia office kai sunzawm dingin an rel. Kohima DC chun, February 2 a thil tung chu a vangduoi thlak hle thu a hril a, sawrkar office building hai chau nilovin, a state hmasawna dinga taima taka sinthawna office hai suksiet ani leiin, a state tading khawma inhmangna ani thu a hril. Additional DC Lithrongla Tongpi chun, office hmangruo le document thenkhat laksana um hai chu Kohima Village Youth Organisation (KVYO) hmalakna a hmu kir niin, DC court custody a sie an ni tah thu a hril.

2016 sungin Kerala-ah suolluina case 2,568 um

THIRUVANANTHAPURAM: Kerala state sungah nuhmei laka suolna a pung hrat hle a hril ani a, nikum 2016 sung khan nuhmei le naupang laka suolna case 16,960 ziekltu ani a, chuong hai laia 2,568 hai chu suolluina case an nih. Insuolluina case hai laia hril hlaw pawl tak chu nikhat laia South Indian Actress Kochi hmuna thuoihmanga an sawisakna kha a nih. Nuhmei laka suolna case ziekltu um hai laia 924 chu naupang kum tlinglo suolluina a na, thil tung 1,644 a hai chun nuhmei iengmalova siema sawisakniin Kerala police in record a siema chun ziekltu a nih. 2016 sung hin Protection of Children from Sexual Offenses Act (POCSO) besana thubuo ziekltu 2,093 a um bawk a nih. Insuolluina chau nilovin, nuhmei laka suolna case hai lai hin inkhuoikhemna, thuoihmangna, dowry leia inthatma le pasalin a nuhmei a sukdudana hai khawm a thang sa ve. Nuhmei laka suolna Kerala state sunga a hluor hle ta chu a ngaimaw thu K K Shylaja, Minister for Social Justice and Health chun a hril a, thil suksuoltu hai chu hremna inpumpeltir an ni naw ding thu hrilin, a state sunga nuhmei le naupang hai an him lemna dingin 24x7 helpline number siem ani ding thu a hril.

Washing machine sungah unau inphir an tla hlum

NEW DELHI: Zanikhan North West Delhi-a Rohini hmuna chun pasal naupang inphir kum 3 mi ve ve-Naksh le Neeshu hai chu puonsawpna Washing Machine sungah an tla hlum. Hi thil hi an nuin bazar-a sabawn phit (detergent) inchaw dinga a fesan kara lo tung a nih. Washing Machine sunga hin puon sawpna ding tui litres 15 vel a um nia hril a nih. Naupang hai nu Rekha chun, Washing Machine sunga tui a thun zoin sun dar 12:39 vel khar an In bula dawra sabawn phit inchaw dingin a suok a, In a hung kir hnungin a nauhai hi a hmu zo tanaw leiin Insurance company a thawk a pasal Ravinder chu a ko a, nasa taka an zawng hnunga naupang hai hi Washing machine sunga a thisain an hmudawk niin a hril.

Taliban hotu in mipui hai thing tamlem phun dingin an infui



KABUL: Afghanistan a Taliban helpawl thuoiit Hibatullah Akhundzada chun Afghanistan mipui hai chu an ram sunga thingkung tamlem phun dingin an fui. Afghanistan rama mipui tamlem chun thlaisuonnga le thil dang danga dingin thing an hmang nasa leiin thingkung an sathluk nasa hle a, hi lei hin a ram sunga thingkung thlawmtiang a pan leiin hasratna nasa tak an tuok mek a nih. Mr Akhundzada hi Muslim sakhuo thuoiit a ni a, nikum May thlaa kha Taliban pawl zawm chau a ni a, Thing phun hi environment humhalna ding, economic ngirhmun siemthatna le ei chengna hnuoi cheimawina dingin pawimawna lientak a nei a nih tiin Mr Akhundzada chun a hril a nih. Afghanistan President Ashraf Ghani spokesman, Shah Hussain Murtazawi chun, Mr Akhundza thuhril Taliban hai nurrawngna thipmawina ding le mipui lungril hnena dinga a hril a nih tiin an tum.

HMAR CHRISTIAN LEADERS' FORUM CHURACHANDPUR, MANIPUR PRESS RELEASE 6th February 2017 The 11th Manipur Legislative Assembly inthlang, March 4 le 8 a nei ding le inzawmin, Hmar Christian Leader's Forum Executive Committee thurel 4-na; Dec 29, 2016, dungzuuin thusuok hieng ang hin siem a nih. 1. Ei hmaa Manipur MLA inthlangna ding hi zalen le thienghlim taka nei hi HCLF dit dan a nih. Chu ding chun, kohran member-hai popo Kristien ei nina le inmawi taka mani vote char thlak seng dinga inhrietitir ei nih. 2. Hnam sunga tlangval tlawmgai pawl hai, tan bik nei leia ralthuom chelek le tharum insuona hrim hrim laka an insiekieng hi HCLF dit dan a nih. Hi thu le inzawm hin HCLF chun tlangvalhai inbiokuina a lo nei ta bawk. 3. Vote zawr hi mani inzauma le hlutna zawr ei nih. Danin a phal lo a ni bawk. Chuleiin kohran member-hai popo mani vote zawr lo dinga inhrietitir ei nih. Election Commission of India dan le dun inza le zawmin, mani vote char thlak ngei dingin HCLF chun mitin a ngen a nih. Ei ram le hnam chungah Lalpa mawina inlang raw se. Hmar Christian Leader's Forum a -in, Sd/-Rev Dr V Lalngakthang Secretary, Sd/- Rev Rohminglien Pakhuongte Chairman, Hmar Christian Leaders' Forum (6.8.10.27)

India sukbuoitu hai chu Anti-National an nih: Kiren Rijiju

NEW DELHI: Delhi University a buoina chungthu le inzawmin zanikhan Union Minister Kiren Rijiju chun tawngbau an suo a, 'nationalism' umzie tak hi chieng kawnga hril thei an nawh a, amiruokchu, mi tukhawm India sukbuoitu le terrorist thlawptu hai chu Anti-National an ni thu a hril a. Freedom of expression hmang tangkaiin, student thenkhat chun India sukbuoi tumna lungril an phan hlak niin a hril bawk. Delhi University a Left-affiliated AISA le RSS-backed ABVP hai inkara buoina suok le inzawm Rijiju chun a hril a nih. Rijiju chun Arunachal Pradesh a seilien ani thu a hril a, India le China border laia tlangram khuo pakhatna 1962 a pieng ani thu le, an khuo chu hun sawt raklo China awpna huoi a um ani thu a hril. "Arunachalee taphawtin an thaw hlak, India hum dinga intiengkama leh ka



seilien a. India hi rambung hrat tak ni dinga inpuokkhatna a nei naw chun, zalenna (freedom) ei ti chu a umzie iem ning a ta?" tiin Rijiju chun a hril. Liemthaw Ningani khan, Rijiju chun Freedom of speech in college campus chu Anti-National thil thawna hmunpuiin a siem naw thu a lo puong lang tah a, freedom changchawia Anti-Indian slogan khekpu chu freedom of speech in a huom naw thu a hril bawk. Delhi University a buoina chu Nilaini a intan chuong ding passenger 7 a laka leiin mi 416 a phur a nih. Ngir puma an phur passenger hai hi boarding passes khawm kuta ziek fawm an pek nia hril a na, ground traffic staff haiin crew hai kuoma computer-generated list an peka chun chuong passenger 7 hai hmung chu a um naw a nih. Dawn newspaper a hi thu hi insuo ani a, airlines haiin suichiengna nei dinga phutna a zieklang a nih.

Ngir pumin mi 7 Pakistan vuongna-ah chuong

KARACHI: Pakistan vuongna pakhatna passenger 7 hai chu Saudi Arabia ngir pumin an vuong lut nia hril a nih. Hi chungthu hi Air Safety Regulation bawsi-etna ani leiin, Airlines thuneitu hai chun suichiengna an nei mek a nih. Pakistan airlines Boeing 777 chu staff hai ta dinga jump seat thangin mi 409 chuong theina a na, tuta vuongna hin seat a full vawng hnungin, ngir puma chuong ding passenger 7 a laka leiin mi 416 a phur a nih. Ngir puma an phur passenger hai hi boarding passes khawm kuta ziek fawm an pek nia hril a na, ground traffic staff haiin crew hai kuoma computer-generated list an peka chun chuong passenger 7 hai hmung chu a um naw a nih. Dawn newspaper a hi thu hi insuo ani a, airlines haiin suichiengna nei dinga phutna a zieklang a nih.

chuong ding passenger 7 a laka leiin mi 416 a phur a nih. Ngir puma an phur passenger hai hi boarding passes khawm kuta ziek fawm an pek nia hril a na, ground traffic staff haiin crew hai kuoma computer-generated list an peka chun chuong passenger 7 hai hmung chu a um naw a nih. Dawn newspaper a hi thu hi insuo ani a, airlines haiin suichiengna nei dinga phutna a zieklang a nih.

Travel ban leiin White House Staff an ban

WASHINGTON: Bangladesh ram suok White House a sinthaw Rumana Ahmed chun travel ban leia a sin a chawlsan niin a hril a, Donald Trump US President dinga White House a luta inthawk ni 8 chau sin a thaw hman thu a hril. Rumana Ahmed chu 2011 khar National Security Council (NSC) a sinthaw dinga White House in a ruoi a nih. "White House a ka sinthaw pawimaw tak chu ka rambung ngirhmun humhala sukhmasawn a nih. Kei hi hijab-wearing Muslim ka na, West Wing-ah hijabi umsun niin, Obama sawrkar chun lawm ka ni zie le an ni laia tiem sa ka ni zie an suklang rawp hlak" tiin Ahmed chun



The Atlantic magazine a article a suksuoka chun a zieklang. "Ni 8 chau ka um hman a nih. Donald Trump in Muslim rambung 7 haia inthawk le Syrian refugee hai US luta a khap khar, US-ah uma sin ka thaw thei ta naw ding ka hriet ngahal a, asan-chu, ka tadinga chng a nih ti ka hriet ngahal a nih" tiin Ahmed chun a hril. Ahmed chun White House-a a sin a tawpsan hma in, Trump a National Security Council (NSC) communications adviser, Michael Anton a kuomah a thutlukna siem chu a hril thu a zieklang. Anton a kuoma chun Ahmed in Trump a administration chun democracy dan a do thu a hril a, Anton chun a en ringawt a, iengkawm a hril naw thu Ahmed chun a hril. Ahmed chu a nu le pahai 1978 khar Bangladesh a inthawk US ah an inpem a, President hlui Barak Obama a hmalakna chun a sukhar leiin 2011 khar White House-ah sin a zawm a, ama chu George Washington University a graduate a nih.

INHRIETTIRNA Ex-Servicemen, Widows le Virmary po po hai ta dingin vawisun (27-02-2017), 11:00AM hin League Office, New Lamka TD Block huongsungah Get-Together a um ding a nih. Member-hai po po Get-Together a thang seng dinga inhrietitir in nih. -Ex-Servicemen League

Army exam paper leak leia centre 6-ah exam thul

NEW DELHI: Zanikhan India pum huopa Army recruitment exam nei ani a, hmun thenkhat question paper a leak leiin centre 6 hieng Kamptee, Nagpur, Ahmednagar, Ahmedabad, Goa le Kirkee a hai exam t hul pha a nih. Paper leak le inzawm hin Thane Police Crime Branch haiin Maharashtra le Goa hai ah mi 18 an man tah. Army recruitment exam

chu soldier clerk, strongman le soldier tradesman lakna dinga nei a na, state tum haia centre 52 ah exam huoihawt a nih. Hi chungthu hi suichiengna nei mek ani a, paper leak a mawphurta hai chu an phutawk hremna pek ning an tih. Police haiin exam petu hai laia mi 250 hai chu zawna indawn dingin police station ah an thuoi bawk.

PM-in Veer Savarkar inzana pek

NEW DELHI: Zanita freedom activist Vinayak Damodar Savarkar a thi champha vavi 51-na le inzawmin Prime Minister Narendra Modi in inzana a pek. Veer Savarkar chu mi huosen tak le India chu ram hrattak le changkang taka siem dinga sinthawtu ani thu PM in a hril. Savarkar chu 1883 khar Abhinav Bharat Society-ah a pieng a, college a kai laia inthawk British hai lakah helna siem ding


thu a khekpu tan a nih. Britain a lekha an chuk laiin, Savarkar chun student ruol a keikhawm a, ralthuom chelek a British sawrkar laka helna siem dingin a thuhne tawl a, anni anga lungril put India mihai leh inpawna hung nei peiin, India a inthawk British hai hnawt dawk dingin helna an siem a nih. Revolutionary Savarkar chu Andaman hmuna cellular jail a khawm kum tam tak an tang a nih.

ISIS zawmtu Kerala mi Afghanistan a that

THIRUVANANTHAPURAM: Kerala thalai mi 17 ISIS zawm niin dinga ring hai laia Hafees chu zanita Afghanistan a drone strike-ah that a nih. Kerala a um a sungahai in WhatsApp message an dawng a, "Hafees chu zanita drone strike-ah that a nih. Shuhada (martyred) a pawm a na, Allah in a hrietchieng tak" tiin message a chun an ziek. Message thawntu chu Kerala a inthawka ISIS zawm nia ring inhmang ve ani a, "kan hunbi tung ding kan ngahk a nih. Insha Allah" tia inziek message a thawn sa bawk. A thi ngei ti sukchiengtu sawrkar a inthawk chun official a inhrietitirna dawng a la ni nawh. Nikum June thla khar

Kerala a inthawk mi 17 ve-lin ISIS an zawm nia hril ani a, chu hai lai chun nuhmei inrai lai le naupang 3 an thang a nih. An inhmang hnung sawtnawte hnungah an sungahaiin message an hmu a, chutaka inthawk National Investigation Agency (NIA) chun ISIS an zawm ngei ni dinga an ring thu an hril a nih. Inhmang hai laia mi Hafesudheen TK chu Kerala ah a kir nawk a, a ruolhai chu Abdul Rasheed a rawia fehmag niin a hril. Abdul Rasheed chu Kozhikode, Kerala a Peace International School-ah hun sawtnawte sin a thaw hman a, ama chu ISIS a thang ding recruitment thawtu hai laia mi pawimaw tak ni dinga ring a nih.

US Democrats chairman dingin Tom Perez



WASHINGTON: US Labour Secretary hlui Secretary Tom Perez chu zanikhan US Democrats in an national chairman thar dingin an ruot. Perez chu Obama in President a chela laia sinthaw a na, Altana hmuna Democratic National Committee meeting huna Democrats chairman dinga ruot a nih.

Democrats chairman chu chawno insang tak niin, chu mawphurna chu mi tam takin an thlakhla hlak a. Perez khawm tum hni vote an thlak hnunga a tling thei chau a nih. Perez chun Donald Trump US President ani hnungin, Democrats chun mi ringzona a tlasam a, mi tamtak sawisel a hlaw niin a hril.

Somalia PM dingin Hassan Ali Khaire

MOGADISHU: Somalia President thar Mohamed Abdullahi Mohamed chun political newcomer Hassan Ali Khaire chu Prime Minister dingin a ruot. Mr Khaire hi British energy explorer Soma Oil & Gas executive hlui a nih. President Abdullahi Mohamed chun a rammipui hai chu prime minister Ali Khaire hi tha taka thlawp dingin a ngen tawl. Prime Minister dinga ruot a ni le inzawm hin Mr Khaire chun Soma Oil Executive Director for Africa a ninaa inthawk an ban tah.



Pakistan le Turkey in Agreements 10 an ziek

ISLAMABAD: February 22-24, 2017 inkar sunga Pakistan Prime Minister Nawaz Sharif Turkey rama an zin huna khar Pakistan le Turkey ram hai chun thawlangna ding Agreements/ Memorandum of Understanding (MoU) 10 an ziek. MoU/Agreements an ziek hai lai hin defence le hydrocarbons tiengpanga thawtlangna ding le money laundering thauh financial intelligence inpektuo ding ti le environment, forestry le a dang dang hai a thang.

President a ninaa inthawk inban a tumnaw thu a hril. Mr Mugabe hin kum 37 sung zet Zimbabwe rama hin rorelna a lo chel ta a, mi tam tak chun Mugabe hi bang ta dingin an dit a nih. Amiruokchu, a party ZANU-PF in chawl ta dinga an ti a ni ngawtnaw chun inban a tumnaw thu le, a

Robert Mugabe in ama thua President a ninaa inthawk inban a tum nawh



HARARE: Zimbabwe President Robert Mugabe chun Feb. 25, 2017 khar a kum 93 piengchampha ropui takin a lawm a, hi huna hin a supporters tam tak chu Mugabe lim umna lukhum khumin an thang tawl. Hi huna Mr Mugabe in thu a hril huna chun politics chawlsan tumna a neinaw baka ama thu chun President a ninaa inthawk inban a tumnaw thu a hril. Mr Mugabe hin kum 37 sung zet Zimbabwe rama hin rorelna a lo chel ta a, mi tam tak chun Mugabe hi bang ta dingin an dit a nih. Amiruokchu, a party ZANU-PF in chawl ta dinga an ti a ni ngawtnaw chun inban a tumnaw thu le, a

party in chawlhadam ta dinga an dit a ni ruok chun leader thalngna dingin extraordinary congress a ko ding thu le ama thlaktu ding mithar ruot nuomna a um chun a dang naw ding thu a hril. A birthday lawmna le inzawm hin party organizer Kudzai Chipanga chun birthday Cake kg. 93 zeta rik zet an siem a, chite tea an darin hi birthday lawmnaa thang hai kuoma sem a nih. A birthday ni indik tak chu Feb. 21 kha a nih. Mr Mugabe hi a hrise-lna thrawn leia hun ieman-ichen zet chawl laa ram-danga damdawi inenkawla um a nih.



Shania Twain, Kum 15 Hnunggah Album Thar

LOS ANGELES: Râwl bâkw or hnuok inthum lo leia tawng harsatna natna 'dysphonia' a nei leia kum 15 zet hla sak ta lo vang vang, 1990s le 2000s bul tienga inlâr em em Shania Twain chun a album thar tlângzar ding an peifel vawng tah niin a hril. Hi a album thara hla pakhat chu a pasal hlui, a producer ni hlak Robert "Mutt" Lange le an inthenea inthawka hung suok/piengg niin a hril.



The Rolling Stone magazine le interview-a chun a natna an enkawl hun sùnga a thil tuok tamtakhai a hril a, a album thar hung suok danhai khawm kimchang takin a hril baw k a. A album hmung ding ruok chu a la sukfel naw niin a hril. Shania chun a pasal leh 2010 an inthea inthawka stress khan a natna hi a suk zool niin a hril. Robert Lange hi Shania Twain producer le co-writer a ni hlak a. Hit inlâr tak tak "The Woman in Me" ti le 1997 kuma "Come on Over" tihai mastermind a nih.

hnga hun hmang dan chanchin/thu hai a nih" tiin a hril. A hla sak dan a thleng tah a, a râwl khâwm a danglam ta niin a hril a. "Tuhin chu hlasak thiem dang ka nih tah. Ka hringnuna ka pal tlàng rinumna le harsatna tamtakhai leh um dan ka thiem ta a. Ka hringnuna kan chuk pawimawtak a nih" tiin a hril. A tum dan chun March hin a Single thar release-in May ah album hi release a tum a nih.

Jodie Foster le Michael J. Fox Han Protest

LOS ANGELES: Hollywood A-list star Jodi foster le Michael J. Fox hai chun kum tina an thaw hlak pre-Oscar party nei ta lovin Hollywood United Talent Agency huohawntain The United Voices rally an nei a, President Trump thilthaw dan tamtak an dit naw zie tarlengin Anti-Trump protest rally ah thu an hril.



Oscar Award pahni dawng tah Jodi Foster hin political thil tlâng hrietina la hril ngai nawa chu tum chu "Suklang a hun tah" tiin a tawng suok ve a nih. "Back to the Future" changtu Michael J. Fox chun, "Arts le movie hi inpukhatna siemta a ni a. Eini rawi hi US lut a vângnei pawl ei nih. A vângnei ve lo refugee tam takhai ei thàng-pui an ngai a nih" tiin a hril a. "Khawvel inthang mekah ei kawle le kieng-ah intheidana, inhnamna a tam deu deuva, inhrithiemna le inlainta a tlâwm tiel tain ka hmuâ, thil a

tha zâwng ngawt thlirtu ka nia chu thil tha lo ka hmu tam ta em em a nih" tiin a hril baw k. "Mani hlutna le inzakaina (dignity) hi miin an mi hrilsiet el theia chu tukhawma an mi lakpek thei nawh" tiin a hril. Michael J. Fox hi Canada mi, kum 20 vel liemta US lut a ni a. Tlângval hmêltha tak film tamtak chang tah inlâr em em, 1991 a inthawka Parkinson's Disease a na a nih. Ama anga migrants hai hnawt suok ding an hei um chu a tuorna hle thu le art hi mi keikhawmtu a nize a hril a nih. "Art thilthawtheina

chu mimal nun chau ni lovin khawvêl khawm sukdamglam theitu a nih" tiin a hril. "The Silence of the Lamb" le "The Accused" haia Oscar award lo dawng thil Jodi Foster chun, "Ka public figure public thil thawna dinga hmang mi ka ni nawa chu, chi hran hrana inthawka hngahai ei bulpui sukderthawnga a um lein khêk suok hun tain ka hriet a nih" tiin a hril a. "Thil chite te hai hi insangtak ei kai theina dinga sirbi pawimaw an nih ti ka hriet a, chite tea thàngpui ngaihai ei thàngpui ding a nih. Tu kum chu kum dang a ang ta naw

leini ei suklang a tul a nih" tiin a hril baw k. President Trump in travel ban a thaw dit naw leini foreign film category-a nominee Iranian director Asghar Farhadi khawmin a thàng naw ding thu a puonga a, ama aiawtu dingin US a um NASA scientist pakhat a ruot. Best Foreign Film-a nominee, Iran, Sweden, Denmark, Germany le Australia hai chun thsuok siemian, "nationalism le fanaticism" boruok insàng taluo an dem thu an puonga, "Ramri le hnam thila in-daidanna hi kan dem a. Hi

Award hi rambunghai inzawmkhawma le art ropuina suklangu thatak ah ngai zing kan tih" tiin an hril. President Trump hin celebrity ama sawiseltuhai a bei let nasa thei em em a. Kha hma met khawm khawm khan Meryl Streep-in a lo sawisêl ta a, na takakin Trump leh Twitter ah an inbei a nih. Award ceremony le show ropui a um zatin host han Trump beina thu iemani tak an hril/thaw zie a. Oscar Award khawm hi ieng ang chen charin am politics râwng a kai ding Pathienni zan hin inhring a tih.

Meghan Markle Nitin Gym ah Darkar 1

TORONTO: Valentine's Day khan Prince Charles leh an inhm zo hnungin Meghan Markle chu Toronto, Canada tieng a kir nâwk a. A film serial chang mek "Suits" season 7 chen a la bak leini a chang zawng zing baw k a, ni tin dârkâr khat gym ah a work-out (exercise) hlak a, a taksa le hmêl khawm a sâr thar em em. Mita hmu an thla lo latuin a hril dan le a pholng dan chun, Meghan hin sweater dum, a dâr po khingtieng tla hnapa dâr le bra hrui inlâng hâkin, skin-tight kekawr dum le Adidas sneaker dum a vara tiel le sunglass dum a bun a. A ruolnu Jessica Mulroney, sweater vâr le kekawr tight dum le Adidas sneaker bun leh Gym a inthawka an hung



suok lai hmu zie a nih. "Ni tin dârkâr khat bek Gym ah insawizawin hun a hmang a, Harry a um nawa chu a hlimin inhawi a ti hle a. A ruolnu le hin hlim takin an innui deu ran a nih,

a hmêl khawm a tha sawt bâkâh a taksa khawm a muk lem tah" tiin mita hmutu chun a hril. A bielpa le hun an hmang sâwt leini a hmêl khawm a sâr "glow" hle niin an lang a tih baw k. Meghan le Harry hi Feb.1 khan Soho House, London ah hmu an ni bâkâh Valentine's Day khawm kha an hmang kawp a. Kensington Palace ah hun sâwt tak an hmang a, tuol an suok meu ngai naw niin a hril baw k. Khawlai lêng nêkin insungâ insukthaboa hun hmang an nuom leini an thilâk khawm hmu ding meu a um naw niin a hril. Report thenkhatin Meghan hin Harry le an in-lai-chinna siemthat zool pei a nuom leini a film chang mek "Suits" khawm châwl-san a tum angin an hrila chu

Meryl, Jenifer, Matt Damon, Oscar Presenter Ding

LOS ANGELES: Entertainment khawvêla inchwimawina insangtak, mi tinin an inhnar em em, Academy of Motion Pictures & Arts buotsai 89th Annual Academy Awards or Oscar Awards 2017 chu Feb. 27 (Pathienni) zan hin Dolby Theatre, Los Angeles a neina ding ah Meryl Streep, Jennifer Aniston, Matt Damon hai presenter nîng an tih. Kha hma khan Salma Hayek, Ryan Gosling, Michael J. Fox, Dev Patel hai khawm sukfel an lo ni tah. Film star inlâr tak takhai chun mipui mit hip ngei an ta chu, a thuhril nuizatum tak tak le tawngbau thiema umin inlâng sienkhawm, a tle nazawng hi rângkachak a nih kher ngai naw angin hmêl tha naw nazawng an zei naw kher nawh.



lo inbuotsai a. Thu hril ding nuizatum tak tak iemani zat an lo siem der tah. Film star tamtak khawmin political comment hai an nei ring a nih baw k a. Abikin President Trump beina ding thu a tam ring a nih. Trump-in travel ban puonga rambung thenkhat mihai khuolzinna a khuokhir leini Oscar Award chen

nia chu Turkey thuneitu han an lo cheltang a. US a lut theina ding chun Homeland Security a inthawkin passport waiver a hmu a ngai a, chu hlak chu a ta dingin hmu an ring naw leini a fe thei ta naw ding a nih. Turkey official haiin an cheltang nasan hi hriet chieng a ni nawa chu "derogatory information" lei ti a nih a. Chu umzie, passport irregularity annawleh helpâwl le inzawmna nei khawm ti thei a nih. Department of Homeland Security chun, "US inzinna dingin valid travel document nei a ngai" ti chauvin a dawn a. Associated Press-in Trump administration lekha a hmu dungzui chun, Department of Homeland Security-in Turkey official hai Khaled dang dingin an hrietir niin a hril.

PCI Mizoram Synod Manipur area Central Nuhmei khawmpui



CCPUR: Feb. 24, 2017 a inthawka New Lamka Biek-in-a Presbyterian Church of India, Mizoram Synod, Manipur area hnuoia Central Kohran Nuhmei Pawl Khawmpuiliin a vawli 10-na tana um chu zani zan khan a lo tumtiek tah. Khawmpui sung hin Rev. K. Neihisal, Coordinator, Kamzathang, Evan Kailianthang, Rev. C. Zoramawia, Administrative Secretary, Rev. Joseph Lalnunmawia, Incharge, D. Phailian Bial le S. Hawikim, Chairman, CKNP han Pathien thucha an hril. Kum 2017-2019 sunga CKNP Chairman thar dingin Thianneilian; Vice Chairman, Kh. Thianngiang, Secretary; Ngaineikim@Kimshi, Assistant Secretary; Hawilian, Treasurer; Thuamkim, Finance Secretary Hoiniang le Committee members dingin mi 9 thlângting an nih. Khawmpuiliin a vawli 11-na chu kum 2019 khin Sugu Pastor Bial sunga nei dingin remti a nih. Presbyterian Church of India, Mizoram Synod, Manipur Area hi Pastorate Area 20 a inthein Kohran Biek-in 99 an um.

UN le Syria peace talks inthina a bomb sukpuok

UNITED NATIONS: United Nations le Syria sawrkarin peace talks nei nawk dinga insingsatna an fepui mek chu helpawl hai ngaiwen a hlaw hle a, peace talks dodalna le inthithaina in hmun hran hrana hai bomb sukpuok an ni tah. Peace talks nei ding thu puonga a uma inthawk, Syria-ah ni 2 liemtah a inthawka thichil bomb puok leia mithi chu 100 an chuong hman ta a nih. Thichil bomb paitu in zanikhan Security service hmun pahni ah bomb an sukpuok nawk. Zanita bomb puoka chun, President Bashar al-Assad a ni ringzo le intelligence chief khawmin a thi pha. Syrian Observatory for Human Rights in a hril dan chun, bomb puoka chun mi 42



an thi niin a suklang a, provincial governor in mi 30 an thi niin a hril ve thung. Bomb sukpuoktu hai chu kha hmaa Al-Qaeda le lo inzawm hlak 'Fateh al-Sham Front' hai an nih. Zani hmasak khawm khan Al-Bab hmunah IS haiin bomb an sukpuok a, mi 77 haiin an hringna chanin midang tam takin hliemna an tuok. Chuong ang buoina um zing kara chun, inbiekna chu nei tho

Manny Pacquiao le Amir Khan April thlain an inhnek ding



MANILA: Hun ieman-ichen inbiek a ni hnungin Philippines boxer le WBO World Welterweight Champion Manny Pacquiao (38) le Great Britain boxer Amir Khan (30) hai chu inhnek dinga sukfel a nitah. Hi dungzui hin Mr Pacquiao le Amir Khan hai hi April 23, 2017 khin an inhnek ding a nih. An inhnekna ding hmun (venue) ruok chu puonglang a la ni nawh. Pacquiao hin tuta hma met khan a Twitter followers hai chu an hnekpui ding boxer thlang pek dingin a

ngan a, chu taka vote hmu rawn tak chu Amir Khan hi a ni a, a twitter followers han inhnekpui dinga Amir Khan an voted hnung hin inbiekpui a ni a, chu hnunga an inhnek ding thu le a hun ding hi sukfel a hung um ta a nih. Mr Pacquiao chun an hnek nawkna ding hmun hi United Arab Emirates a ni ding a nih tiin a hril a, sienkhawm sukchiengna a la um naw a, a hmun ding hi tuta inthawk ni tlawmte hnunga sukfelâ ni ding thu Khan chun a hril. Amir Khan hi kum 2004

Olympics a lightweight a Silver medal lo la ta a ni a, an hnekpui nunhng tak chu May, 2016-a Mexico mi Canelo Alvarez kha a ni a, kha tum khan Alvarez chun Amir Khan hi knock-out in a hne a nih. Manny Pacquiao hi weight paruk-a world champion a ni hnunga nikum April thlâa kha ieman-ichen boxing chawlsan a ni a, sienkhawm nikum November thla khan boxing-a kir nawkin Jessie Vargas chu lo hnebanin a belt a lak nawk a nih.

Commerce Secy Rita in Dubai-ah APEDA a hawng

DUBAI: Dubai a Gulf Food Exhibition nei mek ah, zanikhan Rita Teotia, Commerce Secretary in Agricultural and Processed Food Products Export Development Authority (APEDA) pavilion hawngna a nei. Gulf Food Exhibition chu February 26 khan Dubai World Trade Centre, Dubai-ah tan ani a, ni 5 sung thaw ding niin, March 2, 2017 hin khar ning a tih. Exhibition sung hin rambung dang dang fak le dawn hai pholang a nih. Dubai chu India rama fak siem hai laluttu hai laia pawimaw tak ani a, Basmati Rice, Fresh Fruits & Vegetables, Non Basmati Rice,


Buffalo Meat, Alcoholic Beverages le a dang dang hai chu market a dingin a lak-lut hlak a nih. India a fak siem hai thàngin 2015-2016 a APEDA in UAE market a dinga a thawn suok chu USD 1,371 million a tling phak a nih. Exhibition a hin India a exhibitors 100 neka tam an thàng a, Indian Ambassador to UAE, Navdeep Singh Suri in hawngna hun a uop a, Dubai a Consul General of India, Anurag Bhushan, APEDA chairman D.K. Singh, MoFPI Joint Secretary Parag Gupta le Dubai a Indian Consulate official hran hran khawm exhibition a chun an thàng.

Cazorla inkhel zawm thei ta lo



Arsenal midfielder Santi Cazorla chu a ke a suknat leini tuta season sung po inkhel thei talo ding nghirh-muna a um. Kum 32-a upa Cazorla hi nikum October thla a Ludogorets le Champions League group stage-a an inkhel tum khan an sukpal a, a hliemna hi December thla khan ât a nih. Arsenal manager Arsene Wenger-in season tawp tingin a senior player hi a sawr thei ngei a besei thu lo

Pooja Ghatkar in 10m Air Rifle-ah Bronze medal lak



ISSF Shooting World Cup - 2017, New Delhi khawpua neia uma chun Indian shooter Pooja Ghatkar in 10-metres Air Rifles kap inelna-ah 228.8 points hmuin Bronze medal alo dawng tah. A chungâ hin China mi ve ve umin; Mengyao Shi in points

252.1 hmuin gold medal a dawnga, Dong Lijie in points 248.9 hmuin silver medal a dawng ve a nih. Tuta tum hi Pooja thaw t hat tum tak niin, kum dang Wold Cup haia khan 4th place khawm kai phak ngai loa um a nih.

Jo-Wilfried Tsonga Marseille Open final kai



Title lak inzawm theina dingin tennis hlapthiem Jo-Wilfried Tsonga chun Inrinni khan Australia tlângval Nick Kyrgios chu 7-6(5), 2-6, 6-4 hnein Marseille Open final alo inhlapakai nawk tah. French tlângval hin kum 2015 khan tittle lo lata in kar liemta lai el khan Rotterdam bawka title a lo lak nawk a nih. Tsonga hin second seta tlawmlem sien khawm hung inkhel tha nawkin set thumnaa hratna a hung chang nawk a nih. Tsonga hin Richard Gasquet le Lucas Pouille a hrat lem lem final-ah in hlap pui a tih.

Juventus manager-in Pjaca inpak

Massimiliano Allegri chun Champions League last 16-a Porto laka goal hmat huoiitu thuntu Marko Pjaca chu a lungril le a taksa a puittling tung pei leini goal tamtak a la thun ngei a beisei thu a hril. Italian champion Juventus hin Porto chu lutchil tum hai sien khawm goal an thun thei thak naw a, second half-ah substitute pahni; Pjaca le Dani Alves hai goal ve ve hmangin 2-0 in hmena an chang hram a nih. Juventus manager Allegri chun, "Theina a nei a, chu theina chu a phawrdawk hun ka nghakhla hle a nih. Tuhin chu a ngaituona huoisenin, infit thain hma a sawn hle baw k, ama inthaw k goal tamtak kalo beisei an ni



khawmin ka beisei suol ka ring nawh," tiin kum 21-a upa a midfielder chu an pak thu a hril. Croatia inrena-tional Pjaca hin Dinamo Zagreb ta dingin match 92 inkhelna-ah goal 28 a thun hnungin Juventus a zawm a, Juventus ta ding hin match 14 inkhel tain Porto le an inkhel tum khan Italian club

ta ding hin a goal hmasatak a thun a nih. Juventus club hi Champions League bakah Serie A tieng khawm an tlung hle, league match 25 inkhelna-ah point 63 hmuin hmat huoiitu an ni mek a, an hnuoi char-ah um AS Roma hai lakah point 7in an in sang lem a nih.

FOOTBALL FIXTURE Monday, 27 Feb. 2017 (Tuesday morning) Series A 01:15 Fiorentina Vs Torino Premier League 01:15 Leicester City Vs Liverpool